

**Zeitschrift:** Igl Ischi : organ della Romania (Societat de Students Romontschs)  
**Herausgeber:** Romania (Societat de Students Romontschs)  
**Band:** 64 (1979)  
**Heft:** 12

**Artikel:** Tschun viarvs : poesias  
**Autor:** Spescha, Hendri  
**DOI:** <https://doi.org/10.5169/seals-882368>

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

**Download PDF:** 15.03.2025

**ETH-Bibliothek Zürich, E-Periodica, <https://www.e-periodica.ch>**

# Tschun viarvs

Poesias da Hendri Spescha

*Tgi?*

Tgi scauld'il radi sulegl da damaun?

Tgi, di a mi?

Tgi stat cun mei, e tgi tegn mei en maun?

Tgi, di a mi?

Nibels termaglian e van speras vi,

van speras vi.

Siemis cantinan egl ault dil miezdi,

van speras vi.

Auas undegian e contan e van,

contan e van.

Pradas verdegian salid dil lontan,

contan e van.

Tgi tegn miu cor da pulein enta maun?

Gie, enta maun?

Tgi prenda mei uss ed oz enta maun?

Gie, enta maun?

*Ei van*

Ei van ed ei cuoran, ureidis puleins,  
las uras, las uras dil di.  
Ei glischan e contan ils radis sereins,  
ils radis sulegl dil miezdi.

Ei vegnan las notgs, las uldaunas dil stgir,  
e saultan e fan da temer.  
Ei vegnan anguoschas che fan mei snarrir.  
Di, nua duei jeu setener?

Ei van cun la mumma, ei van cul surir  
dils egls dalla mumma, ei van!  
Ed jeu sedurmentel riend viers il stgir.  
Gie mumma, ti cara, ei van!

*Tscheidi*

Tscheidi vev' in aunghel cattau in carpel,  
in neidi, rodund.  
Tscheidi vev' il bab enta maun in furschel,  
quei era siu mund.

Tscheidi ha la mumma bargiu el zuppau,  
bargiu e bargiu.  
Tscheidi ha' l vischin mia nuorsa pindrau,  
nuorsetta, miu Diu.

Tscheidi ei il tratsch rumplanaus sil vischi,  
il bab, el ei ius.  
Tscheidi ha la mumma detg, uss vegn ei di,  
ed jeu sun staus nius.

Tscheidi er'ei bi; ed il bi ei vargaus;  
ed jeu sun persuls.  
Tscheidi vev' jeu pasch, ed jeu vevel in claus;  
uss sun jeu persuls.

## Buca bragia

Buca bragia, mumma mia,  
cala da bargir,  
sche jeu ditgel oz adia,  
sche jeu vi uss ir!

Sas ti co las steilas schevan:  
Ussa neu, nus mein?  
Sas ti co las flurs flurevan  
tras il di serein?

Sas ti cur che jeu durmevel  
durmentaus da tei?  
Sas ti er che jeu savevel,  
mumma ei cun mei?

Buca bragia, mumma mia,  
cala da bargir,  
er sche jeu hai detg adia,  
tes rest'jeu segir.

## In di

In di mav'jeu sur ina prada verdegonta  
ed erel tut persuls cun mes quitaus.  
Jeu vevel mal il cor d'anguoscha tonta,  
ed jeu tschercavel sust, e miu ruaus.

Jeu mavel sendas jastras, mai vesidas,  
catschaus dil mal ch'jeu vevel stuiu sentir,  
tschercavel in avis, e forsa novas rivas,  
bargevel grossas larmas enten ir.

E lu eis ti vegnida, mumma mia, cara,  
ed has mei en tiu bratsch teniu serrau.  
Ed jeu hai viu co igl amitg sulegl cumpara  
e scaulda mei e tegn mei cauld zugliau.